



Novembar 2021. godine, broj 5.

Općina Stari Grad Sarajevo 

## Čišćenje korita i obale Miljacke od Bentbaše do ušća Moščanice

Veliki projekat čišćenja korita rijeke Miljacke, na dijelu od bazena Bentbaša do ušća Moščanice, u dužini oko 1.400 metara počeo je krajem mjeseca oktobra...



VIŠE NA  
LINKU 

## Otvoreni javni pozivi za stipendiranje učenika i studenata

Odlukom načelnika Ibrahima Hadžibajrića, Općina Stari Grad u školskoj/akademskoj 2021/22. godini stipendirat će učenike i studente iz porodica boračke populacije, te nadarene učenike i studente...



VIŠE NA  
LINKU 

## Općina Stari Grad spremno dočekala obilne padavine i ponudila pomoć drugim općinama

U noći sa četvrtka (04.novembar) na petak (05.novembar), te u dane vikenda, Sarajevo i okolinu zadesile su obilne kišne padavine koje su prouzrokovale velike probleme...



VIŠE NA  
LINKU 

## Snažne poruke iz Starog Grada u momentu vrlo teške političke situacije u BiH

U Velikoj sali Općine Stari Grad održano je Javno predavanje pod nazivom „Stare strategije iza novih maskiranja“ – Sadašnje prijetnje bosanskohercegovačkom društvu i njegovoj državi u duhu vrlo aktuelne i teške političke situacije u Bosni i Hercegovini...



VIŠE NA  
LINKU 





## Čišćenje korita i obale Miljacke od Bentbaše do ušća Moščanice

Veliki projekat čišćenja korita rijeke Miljacke, na dijelu od bazena Bentbaša do ušća Moščanice, u dužini oko 1.400 metara počeo je krajem mjeseca oktobra. Na potpunom potezu radit će se sječenje šiblja i niskog rastinja, trave, okresivanje grana stabala koja se nalaze uz riječno korito, a nakon toga uslijedit će uklanjanje nataloženih materijala i mulja iz korita rijeke. Oko 28 dunuma šiblja i granja bit će uklonjeno s obje strane rijeke Miljacke, a nakon toga će krenuti radovi na čišćenju korita. Procijenjena vrijednost ovih radova je 67.860 KM. Sredstva u izno-

su od 50.000 KM obezbijedena su na osnovu Sporazuma o sufinansiranju projekata regulacije vodotoka potpisanog između Općine Stari Grad Sarajevo, Ministarstva privrede KS i Zavoda za izgradnju KS. Ostatak potrebnih sredstava u iznosu od 17.860 KM osigurat će se iz budžeta Općine Stari Grad za 2021. godinu, namijenjenih za preventivne mjere.

Nažalost zbog velikih padavina i povećanog vodostaja, na obalu su ponovo nanosene veće količine otpada, te će izvođač pristupiti novom uklanjanju čim se steknu uslovi.



### Napraviti popularno izletište

Uređenjem obala i korita rijeke Miljacke na ovoj dionici dodatno će se doprinijeti uređenju šetališta Aleja ambasadora, te Dariva-Kozija ćuprija na čijem se aktiviranju i pozicioniranju među najpopularnija gradska izletišta intenzivno radi. S tim ciljem je kompletna dionica pokrivena video nadzorom, uvedena je moderna LED rasv-

jeta, a urađena je i sanacija saobraćajnice od Darive do Kozije ćuprije. Značajno je istaći i da je na ovom lokalitetu prije dvije godine sagrađen moderni park sa dječijim mobilijarom, spravama za fitness, te spravama za djecu sa invaliditetom. Duž šetnice je do sada 217 akreditovanih ambasadora u BiH zasadilo lipe.



Općinski načelnik  
mr Ibrahim Hadžibajrić

Općina je i prethodnih godina realizovala ovakve aktivnosti, iako to nije u direktnoj nadležnosti lokalne samouprave. Ipak, djelovalo se preventivno s ciljem zaštite građana i njihove imovine, te će tako biti i ovaj put. Čistoća korita rijeke Miljacke koja protiče kroz glavni grad ne smije biti upitna niti se smije dozvoliti da prijete opasnost od zaraze i glodara, kako zbog građana, tako i zbog brojnih posjetitelja našeg grada.



POGLEDAJTE VIDEO PRILOG  
KLIKOM NA IKONICU

# STIPENDIJE



OPĆINA STARI GRAD  
SARAJEVO

## Otvoreni javni pozivi za stipendiranje učenika i studenata: Planirano više od 300.000 KM

Odlukom općinskog načelnika mr Ibrahima Hadžibajrića, Općina Stari Grad će u školskoj/akademskoj 2021/22. godini stipendirati učenike i studente iz porodica boračke populacije, te nadarene učenike i studente i one

koji izučavaju deficitarne zanate, a iznos koji je za te namjene planiran u nacrtu budžeta je 316.000 konvertibilnih maraka. Kao i prethodnih godina, školska stipendija iznositi će 80 KM mjesečno, a studentska 120 KM.

### Stipendiranje djece iz porodica boračke populacije

Stipendije će se dodjeljivati učenicima i studentima iz boračke populacije (djeca umrlih, poginulih, nestalih branilaca, djeca RVI, djeca demobilisanih branilaca, dobrovoljaca, organizatora otpora, ratnih vojnih zarobljenika, djeca lica zaslužnih u odbrambeno - oslobodilačkom ratu i agresiji na BiH), koja imaju prebivalište na području općine Stari Grad Sarajevo najmanje godinu dana prije podnošenja zahtjeva i koja su na redovnom školovanju u institucijama srednjeg i visokoškolskog obrazovanja, čija obrazovna institucija ima sjedište na području Kantona Sarajevo. Konkurs je objavljen 04.11.2021. godine i otvoren je 30 dana od dana objavljivanja u sredstvima informisanja.



### Stipendiranje nadarenih učenika i studenata i deficitarnih zanimanja

Za stipendije nadarenih učenika i studenata Nacrtom budžeta za 2022. godinu planirano je 110.000 konvertibilnih maraka. Pravo učešća na Javnom pozivu imaju nadareni učenici i studenti starosti do 25 godina, koji se nalaze na redovnom školovanju u srednjim i visokoškolskim ustanovama. Uslov je i da nisu obavljali godinu, da su državljanin BiH, te da imaju prebivalište na području općine Stari Grad Sarajevo u neprekidnom trajanju od pet godina. Konkurs je objavljen 04.11.2021. godine i biće otvoren 15 dana.

Za stipendije učenika tradicionalnih i deficitarnih zanimanja planirano je 6.000 KM. Pravo učešća na Javnom pozivu imaju učenici I, II i III razreda srednjih strukovnih škola, koji pohađaju obrazovanje koje traje tri godine (deficitarni zanati), koji nisu obavljali godinu i učenici starih tradicionalnih zanata (šegrti koji zvanje stiču kod majstora starih zanata). Konkurs je objavljen 05.11.2021. godine i otvoren je 15 dana.

Učenici i studenti koji budu ispunjavali uslove dobit će stipendije za školsku 2021/2022. godinu kako bi im se pomoglo u školovanju. Na ovaj način također želimo podstaći i druge mlade ljude da se bave zanatima, a posebno tradicionalnim i starim.



Općinski načelnik  
mr Ibrahim Hadžibajrić



Svake godine izdvajamo značajna sredstva za stipendiranje naših učenika i studenata i to je naš doprinos njihovom školovanju i obrazovanju. Želim da pozovem sve naše učenike i studente koji ispunjavaju uslove da se prijave na jedan od ovih poziva. Mladi ljudi su naša budućnost i trebamo im osigurati uslove da žive i rade u ovoj zemlji. Na nama je da ih podržimo u njihovom obrazovanju i školovanju kako bismo im osigurali što izvjesniju budućnost.





## Općina Stari Grad spremno dočekala obilne padavine i ponudila pomoć drugim općinama

U noći sa četvrtka (04.novembar) na petak (05.novembar), te u dane vikenda, Sarajevo i okolinu zadesile su obilne kišne padavine koje su prouzrokovale velike probleme. Na svu sreću, padavine nisu prčinile ozbiljne štete u općini Stari Grad, kako zbog konfiguracije terena, tako i zbog preventivnog djelovanja. Općina Stari Grad redovno vrši održavanje, čišćenje i kontrolu svojih riječnih i potočnih korita.

U periodu najvećih padavina sa četvrtka na petak, općinski načelnik mr Ibrahim Hadžibajrić bio je na terenu sa uposlenicima. Pratile se stanje na brani Bentbaša, korito Miljacke i Mošćanice, podzemna garaža u ulici Avdage Šahinagića i druge lokacije kako bi se pravovremeno reagovalo. Uvedene su 24-erosatne dežure na rizičnim mjestima. Uposlenici općinskog Odjeljenja za održavanje Aleje ambasadora, putnih pojaseva i javnih površina, kao i pripadnici Operativnog centra općinske Službe civilne zaštite, radili

su danonoćno na čišćenju slivnika u cijelom Starom Gradu. Uveden je hitni Viber broj za bržu i efikasniju komunikaciju sa građanima, izvršen je obilazak starogradskih privrednika, osnovnih škola i socijalno ugroženih porodica. Na taj način zasigurno su izbjegnuti i spriječeni veći problemi.

Usljed vanrednih okolnosti kritične lokacije; branu Bentbaša, bazene, Darivu i Koziću ćupriju obišli su gradonačelnica Sarajeva Benjamina Karić i općinski načelnik mr Ibrahim Hadžibajrić. Gradonačelnica Karić tražila je upute kako da se zajedničkim snagama djeluje na terenu. Gradonačelnica i načelnik istog dana su posjetili i područje općine Ilidža, koje je pretrpjelo najveće štete. Nakon povlačenja vode i na zahtjev građana tog naselja, općinski načelnik mr Ibrahim Hadžibajrić uputio je pomoć ilidžanskom naselju Otes u vidu osiguravanja mehanizacije kako bi se uklonio otpad i očistile poplavljene kuće i dvorišta.



Općinski načelnik  
mr Ibrahim Hadžibajrić



Nezapamćene kiše i slike koje smo vidjeli iz pojedinih sarajevskih naselja opominju nas koliko smo nemoćni pred silom prirode. Apelujem na građane da moraju čuvati prirodu, naše rijeke i potoke. Od ključnog je značaja pokazati međusobnu solidarnost u teškim trenucima, jer samo to je garant bolje i sigurnije budućnosti.



Gradonačelnica  
Grada Sarajeva  
Benjamina Karić



U nadležnosti Grada Sarajevo je i briga o riječnim koritima i pritokama i mi unazad nekoliko mjeseci sa Općinom Stari Grad radimo na sanaciji Bistričkog potoka, te zahvaljujući tom kontinuiranom radu nismo imali veće razmjere katastrofe. Grad Sarajevo je tu i za ostale općinske načelnike i naše sugrađane kojima bude potrebna pomoć. Željela bih se posebno zahvaliti načelniku Hadžibajriću koji je uspio u veoma kratkom vremenu organizovati timove iz općine, obezbijediti dežure na svakom od mostova u općini Stari Grad kako bi se spriječilo najgore.



POGLEDAJTE VIDEO PRILOG  
KLIKOM NA IKONICU



## Snažne poruke iz Starog Grada u momentu vrlo teške političke situacije u BiH

U Velikoj sali Općine Stari Grad održano je Javno predavanje pod nazivom „Stare strategije iza novih maskiranja“ – Sadašnje prijetnje bosanskohercegovačkom društvu i njegovoj državi u duhu vrlo aktualne i teške političke situacije u Bosni i Hercegovini, te konstantnoj i otvorenoj prijetnji postojanju i opstanku naše države.

Predavanje je održao prof. dr. Rusmir Mahmutćehajić, uvaženi političar, mislilac i pisac, a na inicijativu općinskog načelnika mr Ibrahima Hadžibajrića. Prema mišljenju načelnika Hadžibajrića, prof.dr. Mahmutćehajić je najkompetentnija osoba da pojasni prijašnja i sadašnja događanja vezano za tešku političku situaciju u kojoj se nalazimo. Od kraja Prvog svjetskog rata, prestanka vladanja značajnih carstava i monarhija nad ovim prostorima, te nastajanja Kraljevine Srba, Hrvata i Slovenaca provodi se jedna aktivna politika negiranja Bosne i Hercegovine. Pogotovo njenog većinskog bošnjačkog naroda, a sve od strane istočnih i zapadnih susjeda. Srbija i Hrvatska, koje su uključene u razaranje Bosne i Hercegovine, formalno-pravno su priznale BiH, ali suštinski to nisu učinile, naglašeno je na Javnom predavanju u Općini. Iako po mnogima, budu-

ćnost opstanka države i smirivanje političke situacije u Bosni i Hercegovini nije najbolja, prof.dr. Rusmir Mahmutćehajić uvjerava u suprotno. Po njegovom mišljenju, istinske bosanskohercegovačke patriote nikada neće pristati na uništenje svoje države. To je historija pokazala u više puta. Oko postojanja već izgrađenih i formiranih institucija Bosne i Hercegovine ne smije biti kompromisa. To je danas najveća prednost svih nas koji volimo i želimo očuvati Bosnu i Hercegovinu, a koju nikad prije u historiji nismo imali.

Uz Općinu Stari Grad, ovo javno predavanje, organizovao je i Centar za strategijske studije Međunarodnog foruma Bosna. Događaj je privukao veliku pažnju građana i nosilaca javnih funkcija. Među prisutnima na ovoj raspravi i predavanju bili su i Mirsad Hadžikadić predsjednik Platforme za progres, Nermin Ogršević predsjednik NES-a, Semir Halilović (BPS), Amor Mašović, prof Rasim Gačanović, Jasmin Emrić zastupnik u Parlamentarnoj skupštini BiH, Nermin Kljaić ministar unutrašnjih poslova Unsko-sanskog kantona, Mirza Batalović predsjedavajući Općinskog vijeća Stari Grad, vijećnici OV Stari Grad, pomoćnici općinskog načelnika i brojni drugi.



Općinski načelnik  
mr Ibrahim Hadžibajrić



Istina je da smo u vrlo delikatnoj situaciji, pojedini političari se ne libe koristiti najgrublje izraze i prijetnje. Svakodnevno osjetim strah građana, od kojih dobijam pitanje kuda sve ovo ide, nažalost mislim da niko nema tačan odgovor. Sasvim je očito da rukovodeći političari po ovom pitanju ne vladaju situacijom.



Prof.dr.Rusmir  
Mahmutćehajić



U javnom prostoru je potrebno govoriti o ovome, to je jedini način da prestrašeni svijet vidi da se nema čega bojati. Budućnost je u našim rukama, ovo je naša država, mi alternativu nemamo! Ova situacija će trajati dugo, odnosno sve dok se ne konstituiraju jedan snažan bosanskohercegovački politički subjekt, koji će se tome znati i moći suprotstaviti. Tada će se za suprotstavljene političke interese odlučno naći rješenje.



POGLEDAJTE VIDEO PRILOG  
KLIKOM NA IKONICU